

Reacziuns sin las votaziuns federalas

DA MARTIN CABALZAR

■ **Cun maioritads confortablas ha il suveran svizzer refusà las trais iniciativas «A favur dal servetsch public», «Per in'entrada da basa nuncundiziunada» e «per ina finanziaziun gista dal traffic public». Ina clera maioritad hai era dà per la midada da la lescha d'asil, pli fillà è stà il resultat da la midada da la lescha davart la medischina da reproducziun. La Quotidiana resumescha las reacziuns.**

Finanziaziun dal traffic

AutoSchweiz deplorescha che la maioritad da pievel e chantuns ha ditg na ad ina «finanziaziun gista» dal traffic che avess purtà annualmain 1,5 milliardas dapli en favur da la construcziun da vias. Uss sajan ils adversaris dumandads d'ademplir lur empermiscuns en vista al fond da las

vias naziunalas e dal traffic d'aglomeraziun. La decisiun dal suveran saja bain d'acceptar, ella impedeschia dentant ina finanziaziun tenor il princip dal chaschnader. Ina giada dapli sajan ils automobilists «la vatga da latg da la naziun».

Revisiun da la lescha d'asil

Ils socialdemocrats ed ils verds considereschan il cler gea a la midada da la lescha d'asil sco gronda sconfitta per la Partida populara. Il resultat documenteschia che la politica da dretga na correspundia betg a la voluntad da la populaziun. A la pps na saja gnanc reussì d'unir l'agen electorat davos la pretensiun centrala, ha ditg cussegliera naziunala *Cesla Amarelle*. L'approvaziun da la refurma d'asil saja bleranz in grond success per la politica d'asil da cussegliera federala *Simonetta Sommaruga*. La revisiun è vegnida sustegnida da 66,8%.

Iniziativa Pro servis public

Suenter il cler na a l'iniziativa «Pro servis public» gaja la debatta dentant vinavant. L'uniun tetgala dals sindicats Travail.Suisse vul limitar las pajas dals managers da las Viafiers federalas, da la Posta e da Swisscom. L'associaziun dals patrums pretenda dentant ulteriurs pass da liberalisaziun. Concret duai il monopol da la Posta sin brevs fin 50 grams vegnir abolì. Plinavant stoppian las Viafiers federalas cumprovar ch'ellas sajan ablas da schliar ils problems pendants e da megliar il stan insufficient da l'infrastructura, scriva l'uniun da mastergn. Sco quai che il sindacat Travail.Suisse accentuescha posia il provediment da basa uss vegnir garantì a lunga vista. Necessitad d'agir vesa Travail.Suisse cunzunt tar la salarisaziun dals managers en las interpresas parentadas cun la confederaziun. L'iniziativa è vegnida fiersa.

Medischina da reproducziun

Il gea dal pievel svizzer a la midada da la lescha davart la medischina da reproducziun taxescha cussegliera naziunala *Regine Sauter* (pld ZH) sco grond attest da confidenza da la populaziun che haja onurà la lavur fatga dal parlament cun grond senn da responsabladad. Tras acceptar novas pussaivladads da reproducziun possian ins reducir il dumber da scatschadas, è Sauter persvadida. Er il schef da la Clinica da reproducziun al spital universitar a Turitg *Bruno Imhurn* punctuescha che la lescha vegnia applicada cun senn da responabladad «Desinerbabys na vegnia i era betg a dar en l'avegnir. Per tscherts partenaris vegnia la schanza d'ina gravidanza dentant augmentada ed il ristg da disturbis da sanadad vegnian minimads. Quai fetschia senn. Dal reminent vegnia quai gia pratitga daditg en ils pajais vischins.

Entrada da basa nuncundiziunada

Il cler na a l'iniziativa «per in'entrada da basa nuncundiziunada» interpreteschan aderents ed adversaris natiralmain a moda differenta. Per il coniniziant *Daniel Häni* è la votaziun che haja gi in grond eco da las medias er en l'exteriur mo «in pass intermediar». Tut auter giuditgescha il comité na a l'iniziativa: «Quest tema duess uss esser liquidà definitivamain», punctuescha cusseglier naziunal *Marcel Dobler* (pld SG). Per cusseglier naziunal *Yannick Buttet* (pcd VS) è il resultat schizunt «ina gronda schlaffada per ils iniziants». Per il president da GastroSuisse *Casimir Platzer* munta l'iniziativa in signal fauss che engrevegiass la recrutaziun da persunal indigen ed effectuass ina gronda rusna en la cassa federala. Quella stuessia vegnir stuppada cun in augment considerabel da las taglias, argumenteschan ils adversaris da l'iniziativa.